

四庫全書

集部

欽定四庫全書

集部

明詩綜卷四十六

詳校官中書臣涂日煥

主事銜臣徐以坤覆勘

總校官降調編修臣倉聖脉

校對官主事臣陳墉

謄錄監生臣李克文

欽定四庫全書

明詩綜卷四十六

翰林院檢討朱彝尊編

羅洪先

六首

洪先字達夫吉水人嘉靖己丑賜進士第一授

翰林修撰進左春坊贊善罷為民隆慶初贈光

祿寺少卿謚文恭有念菴集

王元美云羅達夫如講師參禪兩處

著脚不堪高坐有唐調

穆敬甫云贊善多講學詩間黃清甫云羅詩詞意貴顯雖取材不

遠而屬  
對為精

靜志居詩話達夫遠師擊壤近仿  
白沙定山然爽氣尚存未墮塵霧

雜詩二首

故人萬里外夜夢忽在茲一去二十年宛若平生儀因  
悲久離別再拜前吐辭舉手雙涕下自訴長相思覺來  
天一涯彼此安得知豈無同心言道遠孰致之人生重  
結交結交在當時對面不傾倒相思亦奚為

煩歎不能寐披衣步前楹仰視天漢流衆星一何明萬

動皆有息人生何所營久佇風露下灑然當我情

獨坐

數月不出戶庭前多夕陰閒看芳樹色一倍舊年深

山中雜詩

問我家何在山深多白雲巖前飛瀑下對語不相聞

後園續詠

二首

棠梨花開深淺黃燕子初飛日漸長草亭坐久客不到  
半雨半風春太狂

南村雲起北村晴  
晴鳩雨鳩更互鳴  
東風吹雨衣不濕  
我在桃花深處行

唐順之 十二首

順之字應德一字義修  
武進人嘉靖己丑進士  
除兵部主事改吏部尋改翰林  
編修歷右春坊司諫上疏請朝東宮  
奪職為民起兵部郎中巡視薊鎮  
還視師浙直超拜僉都御史巡撫淮揚  
天啓中追謚襄文有荊川先生集

穆敬甫云唐公詩典雅

容綽有盛唐體裁顧元言云中丞古體如雲  
津躍龍幻變莫狀近體如風澗鳴琴幽逸有致  
並足流響詞林胡元瑞云嘉靖初爲初唐者  
唐應德袁永之屠文升王汝化任少海陳約之  
田叔禾等爲中唐者皇甫子安華子潛吳純叔  
陳鳴野施子羽蔡子木等俱有集行世就中古  
詩冲澹當首子潛律體精嚴必推應德蔣仲  
舒云弘正間李何輩出海內遵之迨其習樊音  
響足聽意調必歸剽竊雷同正變雲擾太史振  
之爲初唐宏麗該整足稱羽儀黃清甫云應  
德初務清華晚趨險怪考其所撰若出二轍故  
譽有所自毀亦隨之陳卧子云應德氣象爽  
邁才情駿發使能深造當有超乘其  
後馳騁驚功名詭託講學遂頽然自放  
詩話荆川開濟之才閎攬百家靡不融會毅然  
自任天下之重倭人構患志在捍牧圉以保鄉

曲是時督師之權惟用江梅林是寄公舍當局  
二人誰可與談方略者顧不知者以公爲用江  
所薦介溪所知因此薄公豈惟昧于知人并不  
識時務者矣其建平倭之策謂當禦之海外故  
北自崇明南至蛟門乘桴破浪身作先鋒積勞  
而殞是豈專馳騁於功名者耶襄文之謚允符  
公論也已公初與遵巖論文兩不相下既乃舍  
所學從之竊怪集中五言古詩特少殆退舍以  
避遵巖也至於律詩  
質不傷文麗而有體

送孔上公助祭太學歸闕里時賜袞衣一襲

國喜嘉賓至人攀上客行來觀周室禮去入魯王城新  
袞山龍炫餘堂金石鳴聖朝稽古意待爾示諸生



同皇甫子循游橫山

曲磴行來盡松陰轉寂寥不知茅屋近却望石梁遙  
葉響疑聞雨渠寒未上潮夫君軒冕客此地欲相招

送白尉往湖州

君家太湖北作吏太湖南驛路雞鳴近山城樹影含萬  
川疏沃野百室競春蠶幸此猶吾土微官也自堪

張相公壽詩

帷中運策九州清共說留侯在漢京賜第近連平樂觀

入朝新給羽林兵，儒生東閣承顏色。苗長西蕃識姓名，  
却望上台多氣象。年年長傍紫宸明，  
鍾廣漢云壽詩如此典重允稱拔俗

廣德道中

蒼山百轉見炊烟，茆屋高栖古樹顛。細雨薜蘿侵石徑，  
深秋杭稻滿山田。雲中望影迷遙岫，草裏聞聲覺暗泉。  
儻遇秦人應不識，只疑誤入武陵川。

聞復官報京師友人

姓名不復挂朝參，魚鳥由來性所耽。篋裏符經都已廢，

山中藥草漸能諳疎狂自分三宜黜癩病其如七不堪  
深謝故人推轂意莫將陽羨比終南

崔鎮道中晚望懷陳約之

郊原極目思依依楚水連天楚樹微遠浦潮生人獨往  
寒林風靜鳥雙歸泥塗自覺朋游好日月偏催旅鬢稀  
念爾同爲南竈客煙波何事更相違

覽徐養齋見懷毛古菴及小子之作存沒感懷和  
韻

早歲曾陪杖履遊遙思墓木已三秋美人去後空聞笛  
芳草歸時獨倚樓世上玉顏還易老山中石髓杳難求  
却慚司馬頻相許擬向清湖共釣舟

冬至南郊

明王敷大報泰時禮神君位以南離正宵從甲子分月  
臨太乙館星動羽林軍除道疑登岱鳴簫異度汾聲容  
六變合海嶽百靈紛封檢徵題字屏帷悉畫雲神光人  
共見天語帝親聞盛跡誰能賦多慚扈從羣

松關

月出照松關松陰正滿地恐有山僧歸終夜不須閉

筠徑

面面隔深竹茅齋在何處遙聞犬吠聲試從此路去

古北口

諸城皆在山之坳此城冠山如鳥巢到此令人思猛士

天山萬里鳴弓弮

李開先 三首

開先字伯華章邱人嘉靖己丑進士除戶部主

事改吏部歷貢外郎中擢太常少卿提督四夷

館罷歸有閒居集

朱中立云中麓著作甚富一韻百篇蓋白樂天之流也詞

浮意淺繩墨妙中多何為焉

詩話中麓撰述潦倒猶疎然最為好事藏書之富甲於齊東詩所云豈但三車富還過萬卷餘又云借抄先館閣博覽及瞿墨是也先時邊尚書華泉劉太常西橋亦好收書邊家失火劉氏散佚無遺獨中麓所儲百餘年無恙近徐尚書原一購得其半余嘗借觀愛籤帙必精研朱點勘北方學者能得斯趣殆無多人也噫嘻文淵閣藏書例許抄覽先具領狀以時繳納世所稱

讀中秘書蓋謂是已泰典籍微員收掌不慎歲  
久攘竊抵換已鮮完書可為浩歎聞中麓後人  
尚餘殘書數十部巡撫丹徒張公物色之中有  
陸司農禮象一編張公歿後訪之不能得矣

### 苦熱

昏中日在柳炎帝司其職苦渴多病身煩熱何相逼  
浹旬難夜眠近午始朝食止螫藥無能驅蚊扇無力莫爲  
觸暑行且就繁陰息官微罷復久賜冰胡可得神馳寒  
露臺夢想雪山域妄念不須存秋涼當在即

### 塞上曲 二首

虎旅紛紛列虎牙  
龍庭漠漠走龍沙  
未交八月先飛雪  
已盡三春不見花

一春不見煖融天  
自是要荒氣候偏  
落地雪花原是雨  
漫天榆莢不成錢

呂高一首

高字山甫丹徒人嘉靖己丑進士授戶部主事  
改兵部歷郎中出為山東提學副使轉行太僕  
少卿有江峰漫橐

莫子良云先生詩本初唐燕  
國曲江二張而晚出杜陵大



歷諸子間

詩話詩莫盛於正德文莫純于嘉靖之初自後  
七子派行而真詩亡古文亦亡矣山甫與富順  
熊過叔仁名在八才子之列雖未能駢乘王唐  
亦一時之雋也王浚川數當時作者有唐子羅  
子趙子王子江右則有尹子曾子胡子陳子尹  
名臺字崇基有洞山集陳名昌積字子虛有龍  
津集曾胡二子  
不能悉舉矣

### 省中直宿

疎星歷歷露為霜獨宿瑤宮夜未央樹色暗浮天仗外  
香煙遙接御爐傍鈞天月上聞長樂玉漏風移出建章

不遇武皇行幸日空憐頭白滯爲郎

陳束 五首

束字約之鄆縣人嘉靖己丑進士選庶吉士改授禮部主事己復改編修出爲湖廣僉事徙福

建轉河南提學副使有后岡集

王允寧云后岡誠穎秀第語淺

氣促寡詩人之致

皇甫子循云約之詩早鑄四傑晚鎔二張適軫平原晞駕康樂

王元美

云陳約之如青樓小女月下瑩篋初取閒適終成淒楚又如過雨殘荷雖爾衰落嫣然有態

顧元言云約之詩篇篇都秀潤句句少警拔亦就色相中自然寫出 黃清甫云陳詩巧構新

思善詠故跡華而不靡舊而彌鮮益以筋力美  
篇豈少哉 陳卧子云約之典禮之作依然司

隸衣

冠

詩話約之取組  
六朝亦稱典則

### 咸寧山中雪霽晚行

雪霽乍見山殘陽稍辭嶺暝色起煙氛寒光散墟井田  
空獵犬還林凍棲鳥警遙聞野寺鐘初月生俄頃

### 晚望有懷

高閣罷餘霧曠然見遙岑依微夕照滅窈窕寒雲深隱

几獨成趣據梧時自吟  
惟當草元者寂寞知予心

還浙夜泊江口

越嶂宜春望江舫入夜乘潮移  
諸島出雲卷數峰層近  
郭翻多戀還家獨未能  
北堂今夕夢先已度西興

都下秋雨夜飲王子長宅

闊別時何屢蹉跎鬢已侵  
還朝明主賜卜夜故人心涼  
雨杯初覆空堂漏欲沉  
安知非夢寐相對帝城陰

送李子

山城細雨綠蕪滋黃鳥關關送別時海內為鄰千里近  
湖邊傾盖十年遲蟬聲驛路催官騎草色河橋映酒旗  
遙想經行多逸興逢人莫不寄新詩

任瀚 二首

瀚字少海南充人嘉靖己丑進士繇吏部主事  
補春坊司直兼翰林簡討有忠齋橐

詩話少海遇青城山異人授鴻寶修煉法家中  
盤盞皆點汞銀為之同時熊叔仁亦好服食煉  
形之說而羅達夫之死燕齊海上之士或言其  
仙去是時青詞丹籙西內尚未營齋而諸君愛

道實開其先已少海老去自吹秦感粟  
西征曾比漢嫫姚之句詩家類多稱之

病懷

海甸逢南菊殊方也自花江淹新卧病王粲老無家皓  
月千門夜秋風雙鬢華還持石函記勾漏訪丹砂

五丁峽別衡崑

峽天猿嘯萬山秋御宿相逢轉別愁後會知誰先白髮  
清時勞汝問滄洲繩牀對月此村夜霜杵擣衣何郡樓  
聞道西京最蕭瑟可堪歸路曲江頭

程文德 一首

文德字舜敷永康人嘉靖己丑賜進士第二累  
官吏部左侍郎兼翰林院學士改南京工部左  
侍郎贈禮部尚書諡文恭有松溪集

長洲訪常劉二子

籃輿春曉度浮梁懶問城闌六十坊小艇忽臨山盡處  
美人宛在水中央疎籬仄徑紆村巷穉柳夭桃映草堂  
流寓江山元有分脩然安土即吾鄉

蔡雲程 一首

雲程字亨之臨海人嘉靖己丑進士歷官刑部  
尚書贈太子少保有鶴田草堂集

登雷港驛樓

空江返照映孤洲晚泊聊登驛外樓可歎羈懷無住著  
挂帆隨月下舒州

楊博 一首

博字維約蒲州人嘉靖己丑進士除蓋屋知縣



徙長安徽授兵部主事歷郎中出為山東提學  
副使遷參政以僉都御史撫甘肅進右都御史  
兵部侍郎升尚書加少保改吏部進少傅尋加  
少師兼太子太師卒贈太傅諡襄毅有虞坡集  
送雷信菴出按甘肅

湟中形勝地尚記昔年游清海崑崙斷黃河積石流左  
賢失右臂上將得前籌為問來槎客何時到隴州

胡松一首

松字汝茂滁州人嘉靖己丑進士累官吏部尚書贈太子太保諡莊肅有集

舍弟病久得書知小愈喜而有作

汝病經年久常時繫我思池塘春草夢江海鵲鷦詩歲暮悠悠別天涯寂寂時忽傳消息到喜報細君知

鄭大同一首

大同字皆吾莆田人嘉靖己丑進士歷官刑部右侍郎贈尚書

天游觀

輕輿斜日上高峰  
瘦竹疎花萬壑風  
獨鶴一聲松影亂  
月明人在白雲中

楊爵一首

爵字伯修富平人嘉靖己丑進士除行人擢河南道監察御史上書劾夏言郭勛因極言朝政  
廷杖繫獄者再久而得釋卒追謚忠介有斛山

集

詩話斛山手觸逆鱗甘以其身顯棄封事大略  
謂目前之憂甚大大抵因仍苟且兵戎廢弛公  
私困竭奔競成俗賄賂通行遇災變而不憂非  
祥瑞而稱賀諂諂面諛士風民俗於此大壞而  
國之所恃以為國者埽地盡矣又云天下之患  
莫大乎以危為安以舊為利實則可憂而以為  
可樂法家佛士日遠而快意肆情之事無敢有  
齟齬於其間積弊而至於盡則不可得而救矣  
永陵見之震怒下鎮撫司重笞下獄於時晉江  
周主事天佐救之而死文登浦御史鉉再救之  
而又死繫獄五稔始得釋繞旋里永陵復諭東  
廠拘之斛山之在獄也校尉蘇宣喬某楊棟獄  
官洪百戶咸哀焉及再被逮緹騎亦憐之不相  
促迫斛山飯已即行立門屏前傳語家人曰有  
旨見逮吾行矣觀者流涕獄中撰周易辨錄其  
論文云文以理為主以氣為輔不以偏邪之見

亂其心本諸聖賢之言以充養之如此則造語皆自胸中流出其吐詞立論愈出愈新而無窮如日月在天窮居深谷花草木之微青者自青白者自白仰之以生輝觸之而成色矣旨哉言乎詩則信口而作不求工也

### 中秋懷友

寂寞復寂寞還如去歲秋美人消息遠令我心悠悠吳水既東去秦山不可求思君譚道處念此日幽憂

### 林恕 三首

恕字道近長樂人嘉靖己丑進士歷官雲南按

察使有西橋集

詩話西橋近詩依然  
林子羽王安中流派

舟次白沙驛

長安何處所孤櫂發閩關  
白擁沙邊驛青迴江上山  
風濤添別淚村酒破愁顏  
羨爾溪中鳥閒雲共往還

同蔣蒙菴朱豹厓登合浦海角寺

共是天南客相攜海角行  
山連銅柱界水匯越裳城  
落日潮聲起高秋蜃氣清  
故鄉回首望歸雁斷南征

宿唐浪村

黃精釀熟豆初花  
籬落蕭疎遠市譁  
地僻虞羅依岸曲  
天寒漁火傍江叉  
燕尋舊壘穿重幕  
竹引新篁過別家  
對景蕭然幽興發  
可甘萍梗負年華

薛甲一首

甲字應登江陰人  
嘉靖己丑進士除兵科給事中  
以言事謫累遷江西按察副使致仕有畏齋  
類稿

生居

生居盈萬間死居纔七尺七尺已有餘萬間何戚戚造物與我身此身應我役曷以我身故令我不自得

楊祐  
五首

祐字汝承錢塘人嘉靖己丑進士有丹泉集

詩話汝承諸體瀟灑拔俗今鄉鄰論詩無人屈一指者可歎也

答陳李二侍御

吏隱滄洲遠江楓伴索居秋風一雁過忽枉友朋書獻



納看君輩聲名動直廬東南民力竭奏記意何如

湖夜

湖夜熒熒白蘋風嫋嫋秋斷霞斜照雨冥霧濕依樓萬  
國仍多難浮生祇百憂滄江有漁笛何事獨悠悠

雨懷

山城積雨春無事江閣停雲晚自怡芳草不知隨處合  
賓鴻何意獨歸遲壯游東閣題詩處恩幸南宮錫讌詩  
風景不殊京闕異江湖深繫廟堂思

九日登泰山

殊方此日逢重九絕嶽高吟散遠愁  
漢時秦封空往事紫萸黃菊自深秋  
天清樓閣明三觀野曠山河辨九州  
獨是懷親憂國意白雲滄海共悠悠

簡田長官

矯矯田郎三輔賢省曹播越五經年  
河洲水竹新開郡暇日閒看沙鷺眠

陳子文

一首

子文字在中閩縣人嘉靖己丑進士歷官湖廣  
按察副使

夜泊皖城村舍

孤舟野泊初遠寺疎鐘起茅屋兩三間懸燈深樹裏

桂天祥一首

天祥字子興臨川人嘉靖己丑進士由兵部主  
事改監察御史巡按山西山東出知大名府

發和州

樓船開旭日涼露灑征衣擊楫橫江浦投詩采石磯  
潮來紅蓼没人語白鷗飛天際瞻宮殿金陵在翠微

吳子孝

四首

子孝字純叔長洲人尚書一鵬子嘉靖己丑進士  
改庶吉士授工部主事以光祿寺丞出爲湖

廣參議提督太和山有玉涵堂橐

皇甫子循云龍峰才情既

美興寄尤深其詞婉以麗其響和以平其思悠以儻故能蓄藻於建安騰聲於天寶希躅於少

陵速駕於長慶

詩話純叔籍甚詩名特格未高聳其論詩云世  
之蕘童牧豎矢口而成章田翁野嫗發聲而中  
節彼蓋不知何者之爲詩況詩之所以妙何也  
天地之機洩之於人者不知其所以然而然也  
夫詩以言傳亦以言隱求之於迹者非也求之  
於音者亦非也求之於揣摩擬議者亦非也數  
語足當正嘉  
詩人鍼砭

### 燕

數見沙頭燕翩翩故傍人定知巢已就偏愛語相親碧  
樹江波闊烏衣故國春春簾誰爲汝飄泊數沾巾

### 送邨薦和奉使東萊

上宰承周昭王官抱楚才堂封鸞詔下鏡吹錦帆開海  
屋魚龍夜仙宮日月臺相如誇負弩旂節幾時迴

秋日與子浚子約小集子循甫赴日南

莫問銀河淺須憐玉笋空洛雲三歲隔楚月一宵同風  
櫪悲窮驥秋砧亂候蟲新涼有離思萬里憶征鴻

送楊獻甫之官四川行間參軍十二韻

越嶠憐君去相違萬里餘軍參孫楚事筆草孟嘉書魚  
鳥驚新陣貌貅耀舊旗枕榔山葉暗躑躅野花疎村女

誇種布羌人趁葦墟地當三蜀險府控百蠻居關徼留  
繻日風雲按轡初巴渝歌甚樂兵騎報寧徐才重松州  
幕恩垂洱水車遷喬應不忝學武昔無如贊畫元戎喜  
籌邊勁寇除少年誰得似俠氣滿儲胥

沈愷二首

愷字舜臣松江華亭人嘉靖己丑進士歷官寧

波知府升湖廣右參政有環溪漫集

徐伯臣云鳳峰長子

律

皇甫子循云環溪閱眇之製湛思以宣綺麗之詞緣情而得茵鼎之貴不能奪蓴鱸之思

熊軾之華無以輓扁舟之興不既深於詩乎  
穆敬甫云沈詩肉骨勻稱條達不滯李時遠  
云舜臣詞翰瀟灑有出塵之致

園中雜言

二首

洪鈞陶萬象品彙皆天情四時忽代謝歲功賴有成物  
理鮮常盛天道有虧盈哲人秉大觀所以稱達生伊余  
無所好夙抱幽人貞一丘常自足千駟良可輕寵祿豈  
足貴賤者乃有名

中歲不自好營慮相糾纏寧如返初服停策倚林泉豈



不羨松喬生本無僊緣鍊形得長生此事終茫然有溪  
亦可漁有山亦可田營已良已足踰分詎自全青陽不  
再御朱華苦易捐欣然命旨酒且以娛天年

王穀祥

二首

穀祥字祿之長洲人嘉靖己丑進士官吏部主  
事有酉室集

梅花

風引上春香雪弄江南色為有惜花心樓中莫吹笛

水仙

瑤環月下鳴翠帶風中舉胡然洛浦神胡然漢濱女

沈謚一首

謚字靖夫秀水人嘉靖己丑進士除行人擢吏

科給事中終江西按察僉事有石雲家藏集

詩話先生師於陽明甘泉友于龍溪窮  
研理學故其詩品亦在元豐淳熙之間

游殊勝寺

畫舫連雲動驚濤帶雨飛青山天外出白鷺寺邊歸僧

倡傳金粟蟬聲隱翠微  
洞庭乘興遠直欲老漁磯

蔡穀一首

穀字天章寧晉人嘉靖己丑進士除行人擢浙  
江道御史坐劾汪鋐廷杖為民尋以原官起用  
再謫山東按察知事隆慶初復職致仕有汶濱  
集

過桑乾河入雲中

白草黃沙漠使稀  
桑乾渡馬駐斜暉  
孤城雉堞依黃土

古戍狼煙起翠微  
入夜角聲驚客夢  
凌風霜氣裂征衣  
雲州一望天連水  
惟是山頭朔雁飛

周顯宗 一首

顯宗字子孝濮州人嘉靖己丑進士除秀水知縣歷官漢中知府有桃村山人自適稿

詩話桃村於詩未臻門徑惟意所之自序稱感興而作不事強索亦未嘗規規於古人自知之明亦已審矣集中絕句小詩有偶合者

宿安平驛

湖靜冰初合人喧市晚收夜深誰共語寒月獨登樓

莊一俊一首

一俊字君渠晉江人嘉靖己丑進士官至參議

小居

雀飲硯池水蝶翻菜圃花雖非高士宅終是野人家

張意一首

意字誠之崑山人嘉靖己丑進士官南職方郎

有日涉園橐

皇甫子循云誠之詩無取模倣而間合雅音本之性靈得於天趣也

詩話誠之與兄情後先取甲第情有公餘寓拙  
橐詩無足錄者自序以為習氣未除興到輒就  
不求其工自適其適可  
謂得失寸心知者也

世宗皇帝輓詩

神謨憑玉几顧命託儲君  
詔下輪臺悔哀傳薄海聞  
弓號遺劍舄龍去失風雲  
丹宸依然在宮鑪冷夕薰

楊本仁 一首

本仁字次山杞縣人嘉靖己丑進士有少室集

山行

山路登攀倦鄉關何處邊迷津歧路口立馬亂峰顛白  
髮雙親遠黃河一綫懸俯看鴻雁影難寄益門篇

曹世盛 一首

世盛字際卿閩縣人嘉靖己丑進士歷官廣西  
參政有方坡集

送凌應賢判常德

雄郡開南紀行旌出北燕別憐孤館夕交憶故鄉年曉  
月沈平楚春山帶遠煙離魂與孤鴈共逐洞庭船

孔天胤 一首

天胤字汝錫汾州人嘉靖壬辰賜進士第二以王府親外補陝西提學僉事歷浙江右布政使有文谷集

詩詒管涔山人如新調鸚鵡  
雖復多言舌音終是木強

鴈山峰洞壑之勝水石之奇雲物之美多在靈巖予往臨眺述景散懷

紆轡試委塗迴策亦尋壑過澗厲潺湲攀厓凌峭嶸步



滑苔已沈手援葛猶弱磴竟造幽禪山平臨化閣列峰  
非一竒芳林紛沃若空水望如煙絕巖驚欲落深洞海  
冥冥曾城天漠漠雲物倏然改霞氣時間作景與元閣  
并跡乃靈仙託將來琴高鯉或馭王喬鶴

朱衡一首

衡字士南萬安人嘉靖壬辰進士除尤溪知縣  
徙婺源徵授刑部主事累官右副都御史巡撫  
山東入為工部侍郎改吏部升南京刑部尚書

尋以工部尚書兼副都御史總理河漕加太子少保召還掌部事有鍾山稿

十四夜待月

日入石梁暝攜僧待華月萬籟方激瑩孤鐘助淒越素影澹青襟清輝鑑元髮憮焉遐意存暢矣浩歌發歌聲難以竟流響振林樾

閔如霖一首

如霖字師望烏程人嘉靖壬辰進士歷官南京

禮部尚書贈太子少保有午堂集

游迎恩寺甯氏園林

逕轉金沙淨壇依石洞幽樹深寧受暑蜩咽似迎秋空  
翠含雲落新泉帶雨流歸驂楊柳陌十里暮煙浮

蔡汝楠 三首

汝楠字子木德清人嘉靖壬辰進士除行人遷  
南京刑部郎中出知衡州府歷江西參政山東  
按察使擢兵部侍郎改南京工部有自知堂稿

唐應德云白石畫洗鉛華獨存本質侯舜舉  
云白石詩諸體皆合五言類陸機沈約易者擬  
子昂七言近體與盛唐諸公相軋而七言古多  
似高岑五言近體多似王孟穆敬甫云蔡詩  
思深語險不落塵詮洪朝選云蔡白石弱冠  
即以詩聞初學六朝既而學劉長卿最後又學  
陶韋王元美云蔡子木如嬌女纖流黃不知  
絲理強自斐然又云子木少年雅慕建安晚攻  
錢劉索然易盡顧元言云司空詩聲調清雅  
情興高朗晚歲率意應酬似出二手黃清甫  
云子木登第最早服官留都與皇甫伯仲日相  
倡和雅有令譽送別登臨佳句未嘗不在人口  
也既而官爵日尊詩格日  
損必窮乃工宜其然邪

詩話白石詩名籍甚與四皇甫相酬和唐應德  
亟賞之云白石今之名家也一變而得古作者

之精僕非知音亦三歎不能自己而其鄉錢守  
中撰竹里老人沈宗殷傳備述正嘉之際湖州  
人物之盛有云長興則吳布衣琬安吉則陳大  
參良謨烏程則凌訓導震歸安則嚴知府鳳吳  
知縣廉唐主事樞德清則沈僉事松武康則駱  
編修文盛而劉尚書麟自江右至居蒙塢孫山  
人一元自陝西至居戴山  
云云獨不及白石何也

## 武夷山詩

夙慕武夷游已入晴川境  
稅我塵中車振衣三秀嶺  
樹暝疊浮嵐溪虛寫澄影  
石竇通海流援巖嘯峰頂  
空洞駭迴飈遠矚殊景倏  
爾昇雲煙魚復徹軒屏晨  
翠流

耳目霄陰濯襟領靈跡冠閩甌真機會箕穎榮素實殊  
塗俾予發慙省

化劍閣贈田柅山督學

昔與君子別乃在荆門山雲濤緬相失五載隔五關武  
夷寧不懷欲來分水艱不因覲省暇何能晤清顏信矣  
延平津神會自昔然高閣出幽岫雙溪迅驚瀾山雨尖  
燠銷林華芬藻繁泓澄隱風雷磊落明琅玕方諧意未  
悉將別念彌難豈無聲音及獨悵形蹟單有緣期後逢

更極平生歡握手何以贈永好在弗諼

送陳郎中出守廣川

戀別南州守聊為越客吟三江看雁盡五嶺入雲深風  
氣通蠻落人煙接海陰方將帝命并切飲冰心

呂光洵一首

光洵字信卿紹興新昌人嘉靖壬辰進士累官  
兵部尚書兼副都御史巡撫雲南改南京工部  
尚書未任卒有期齋集

立春前雪應制

天惟元德感帝念小民依送臘能呈瑞先春果應期兩  
儀渾並色萬有倏交輝欲繼周文詠還輕郢曲稀

林應亮一首

應亮字熙載侯官人嘉靖壬辰進士歷官戶部  
右侍郎總督倉場有少峰集

宿會江

古驛山城外寒江客到稀潮平見魚戲葉落聽禽飛遠



火行人語荒原古渡歸徘徊不知夕零露忽沾衣

范

欽 五首

欽字堯卿一字安卿鄞縣人嘉靖壬辰進士累

官兵部右侍郎有天一閣集

詩話堯卿格律自矜第取材太近時倡和者沈嘉則呂中甫諸人未免聲調似之其藏書最富今浙中舊族若山陰鈕氏祁氏吳興潘氏沈氏攜李項氏郁氏高氏胡氏遺書盡散惟范氏籤帙尚存惜未能泝江就閱也

江上翫月

萬里空江月孤舟日夜看關山何處是烏鵲不勝寒氣  
逼銀河轉光含玉露團踟躕瞻斗極髣髴辨長安

寄陳駕部國祥

不見陳司馬蹉跎幾歲年長江無旅鴈絕塞有風煙羽  
檄連宵動瘡痍何日痊憑將賈生疏太息漢庭前

雪中簡王惟和

寂寞梁園客迂迴剡曲家一冬初破雪萬里正飛花帶  
雨斜侵慢迴風曲抱沙相看如不醉孤負此年華

姪澈使滇南

鳳歷千齡啓龍函六詔傳雲開使星路地盡夜郎天頌  
瑞符虞典祈靈異漢年可令籌國計人復數張騫

東歸次錢塘先寄弟

月落天將曙風高浪欲層夜來春草夢先已度西陵

蘇志皋一首

志皋字德明固安人嘉靖壬辰進士除瀏陽知  
縣徙進賢徵授刑部主事歷郎中出爲僉事遷

副使升布政使以僉都御史撫遼東遷右副都御史有寒邨枹罕二集

早朝奉天殿接詔

禁漏沈沈曉色遲迴廊華月隱參差玉階直接承明殿  
銀漢遙通太液池咫尺雲函頒聖詔逶迤宮扇肅朝儀  
微臣亦見天顏喜未必長教近侍知

顧存仁 二首

存仁字伯剛太倉州人嘉靖壬辰進士除餘姚

知縣入為禮科給事中言事廷杖編管保安

隆慶初起用官至太僕寺卿有東白草堂集

薛仲

常云吳中詩大都模擬而出雖自相誇詡稱為作者而知言之士不無遺論矣伯剛諸體溫厚和平忠愛惻惻根諸心而寓諸言不假組織而依詠成章得雅頌風騷之遺周子顥云居庸

山人詩和平雅澹

詩話陸子餘劾張桂作奏時鬼嘯於庭顧伯剛起草則鬼近榻前其聲迫矣詰旦鴉又鳴戶上而兩公直言不諱雖受廷笞未嘗殞命使有畏縮何以成名乎伯剛所言五事具一論及黃冠故答鴻山漸山詩有潮海空傳佛骨書之句也是時金錄青詞猶未盛而徙薪曲突君子重其

知先  
幾焉

岔道

目極長安嶺春生岔道屯看花頻掩淚聞鴈欲銷魂  
霧侵衣濕風沙隔面昏據鞍悲髀肉徒切壯心存

對月

清光此夕爲誰秋關月能禁故國愁何處笛聲吹不斷  
卧看北斗挂城樓

周復俊二首

復俊字子籲太倉州人嘉靖壬辰進士仕至太僕寺卿有六梅館集

詩話子籲甄綜鄉黨之詩為玉峯詩纂而以已詩請楊用修評點亦稱好事第諸體多膚淺不足觀

涑水官舍感懷

今夕復何夕倚此明燭光疎星燦前帷三五河漢旁天寒邊雲白歲暮堠草黃古云易水寒重以繁露霜迢迢遠行遊塗軌浩無方眇余苦不達素髮垂中堂所嗟志

徒苑四牡厲周行

白水驛早發

東方日未明寒林鳥將散  
靄靄川霧昏縷縷邨煙亂  
崩雲卧岑崖狂飈決門閉  
迢迢白水程栗栗黑墳岸  
陰陰蟲知曙喑喑難迎旦  
狺狺儼狙伏徒御失魚貫  
稍聞滇水寒已習炎方曛  
涼冷雖迂時陰陽自貞觀  
吹萬感威發致一疑漉漫  
霜封紫柯榮冰蝕丹蘄  
榮遊子悲遠鄉風興轉  
勞憚朱輪一何翩元冬  
豈爲玩驛驛激靡懷鬱



鬱累方歎五斗陶令奔一瓢許君判扣角白石罟乘桴  
滄海惋永言緝修軌末以塵嬰絆

浦應麒一首

應麒字道微無錫人嘉靖壬辰進士官春坊贊  
善有後巖集

次韻強德州

林屋秋高已自涼山中新酒熟鵝黃銀絲豈必鱸魚膾  
金粟齊飄桂樹香泉石最憐微著雨芙蓉正好未經霜

臨流不盡歸橈興  
隔水漁燈見小航

呂懷一首

懷字汝德廣信永豐人嘉靖壬辰進士改庶吉士歷官南京太僕寺少卿有巾石先生類稿

阻風登觀音閣用韻

憑高獨上觀音閣  
落日還登燕子磯  
鳥道重重高峽險  
煙波漠漠遠山微  
岸吹夜浪豚相拜  
厓護春巢鷁遠歸  
聞道鑾輿回北闕  
歡心直向五雲飛

王梅 六首

梅字時魁平湖人嘉靖壬辰進士選庶吉士除  
刑部主事謫判滁州有柘湖集

詩話柘湖風神韶亮得無累  
之神絕句小詩尤見清拔

送林節推赴任瓊州

見說瓊州地煙中疊浪開遠天分島溆晴蜃結樓臺水  
館鮫人識風檣賈舶來枕椰秋樹好莫怨夜猿哀

登滁州城

淮北淮南節候同  
荒臺無限北來鴻  
愁成短夢青山外  
倦倚高城夕照中  
雲樹不堪連海岱  
商歌何處起秋風  
橫塘窈窕寂蘋花  
老欲采寒香薦醉翁

江干曲

估客乘潮去  
春風幾度寒  
江潮元有信  
日日至長干

偶成

滁州城樓雲滿梯  
滁州城下水連堤  
臨流欲渡無舟楫  
愛殺江蘿葉正齊

題畫寄張廷瞻

渺渺平蕪淺淺沙垂楊疎處見人家  
二年京洛緇塵滿愛殺芳洲杜若花

南津

南津津頭春水新草堂滉漾搖青蘋  
漁歌窅窅遠山碧時有鷓鴣飛近人

許應元 二首

應元字子春錢塘人嘉靖壬辰進士除泰安知

州徙泰州徵授刑部員外郎進郎中出知夔州  
府升四川按察副使調廣西遷右布政使有濟

堂稟

皇甫子循云子春短  
律淒清長歌瓌壯

再過懷玉感述

瑟瑟零雨暮熒熒燈燭光我僕亦已痛偃息臨廣堂我  
何獨不寐起坐思縱橫念我同懷人遠遊在冀方豈無  
二三子與子共翱翔良友信可懷寧知非爾兄引領既  
北睇側身復東望倚閭久相待何以遲遲行修途餘暑

雨塗潦沾衣裳願言託晨風飛止即故鄉

己酉夏宣城道中作

水國去已遠旱陸茲方永朝行指墟煙午餉閱田井曲  
薄蠶事歇來年供秣秉丁男與紅女所務良自黽予亦  
勤餽粥安能厭馳騁微月沈西麓羣壑倏已冥杳靄聞  
鐘聲幽林隔人境且復息微躬明發還耿耿

錢

嶺

六首

嶺字君望揚州通州人嘉靖壬辰進士歷官參

議

憫黎詠

六首有序

嘉靖戊申崖吏失御重以積蠹之餘羣黎遂叛  
攻掠城邑遠近繹騷撫者無策漫以牛酒從事  
越歲不戢當路請命征討予分典戎事深悼誅  
夷之慘用廣咨諏卒藉天威誅獲渠首殲蕩醜  
類總五千餘級諸邨悔過悉歸順焉庚戌夏四  
月三日奏凱底定追惟致寇有因覆車當戒感



時述事潛然有懷

在昔邃古初鴻濛闢天地巨擘嶂南海五指鬱蒼翠中  
有黎母居伊人尚蒙昧鑿井以飲渴農田亦時藝荒路  
曖匪通幽局或交市雖爾隔華界猶紀王正歲生黎若  
草木榮隕隨和厲熟黎若鳥獸于何勞智慧所以古先  
聖馭之以不治

粵南本炎嶠矧此瓊崖東元冬日且和幽郊鮮陰風花  
柳蔭廣隰苗黍青芄芃皇仁漸南極草木均化工豈獨

茲黎人物與非吾同軍行直人日感歎心沖沖

朝發城東門夕駐藤江壘殺氣千層雲狼師渡藤水雞  
犬皆震驚人民盡奔徙海避愁蛟蛇山匿畏虎兕蛇虎  
猶可虞狼毒不可邇軍令甚分明顛仆何由弭伶俜泣  
路衢迸淚不能已嗟哉一將功豈獨萬骨毀

海南無猛虎而有麋與麋玄崖產珍木種種稱絕奇斯  
物出異域頗為中國推以茲重徵索奔頓令人疲窮年  
務米獵為官共饋儀苦云近歲盡無以充攜持直欲訴

真宰鑿此蘇民脂物理固有然怛勞人思

葉落當歸根雲沉久必起黎人多良田征斂苦倍蓰誅  
求盡餘粒尚褊犢與豕昨當租吏來宰割充盤几吏怒  
反索金黎氓那有此泣向邏者借刻箭以為誓貸一每  
輸百股削尤相擬生當剝肌肉死則長已矣薄訴吏轉  
嗔鎖縛不復視黎兒憤勇決挺身負戈矢鎗急千人奔  
犯順非得已赫赫皇章存今人棄如紙

朔風戒良節赫赫張皇師軍門號令嚴震肅將天威壯

士快鞍馬鋒鏃如星飛一舉破賊壘刀斧紛紜揮剖尸  
越丘阜踏血腥川坻白日暗西嶺瘴氣昏餘暉翅鼠墮  
我前饑烏逐人歸征夫懷慘憂涕泗霑我衣黎人奉同  
性云胡登禍機神武貴勿殺不在斬獲為息火當息薪  
弭兵當弭饑誰生此厲階哲士知其非

尹耕十四首

耕字子莘蔚州人嘉靖壬辰進士由兵部郎中  
出知河間府升河南按察僉事坐劾戍遼左有

朔野集

詩話李何詩派並行曾未幾時而學李者漸少  
宗何者日多學李得其風骨者前有凌漢後有  
朔野而已朔野以邊才自負一蹶不振  
坎壈而終詩如曉角秋砧聽者悽楚

修邊謠

去年修邊君莫喜血作邊牆牆下水今年修邊君莫憂  
石作邊牆牆上頭邊牆上頭多凍雀侵曉霜明星漸落  
人生誰不念妻孥畏此營門雙畫角

黔縣道中

嶺峻橋橫渡泉懸水逆流映空峰影亂觸石浪花浮歲  
月悲行役衣冠憶舊游望鄉雙淚眼休上最高樓

韓淮陰侯廟

背水空留陣良弓早見收身危緣震主面相止封侯落  
日荒祠道西風澗水秋君臣終始義為爾淚長流

關忠義祠

盪寇襄樊日長濤滄魏軍氣雖雄百戰功竟偃三分鬼  
馬騰空阜靈旗掣亂雲神絃朝暮曲長向嶺頭聞

秋興 四首

銅龍春闕曉光寒  
金水橋橫白玉欄  
見說漢皇求大藥  
故邀王母到長安  
黃金夜獻文成竈  
青鳥朝翔太乙壇  
不是歲星陪帝輦  
蟠桃誰奉殿中歡

薊門千里接雲中  
燧火清宵警報同  
合陣幾窺青海月  
鳴鞭爭下黑山風  
殘冬戰士衣仍薄  
荒歲孤城廩欲空  
南國十年輸輓盡  
防秋諸將慢論功

十萬鳴弦報吉囊  
去來飄忽是花當  
連姻故自輕中國

分道頻看入漢疆推轂丈人空肉食操戈遺孽尚蕭牆  
不應干羽修文日歲歲三關有戰場

威名萬里馬將軍白首丹心天下聞遼水旌旗餘殺氣  
泰山松柏已高墳條侯自靖中州變竇憲曾名塞外勲  
獨倚凌煙思將畧暮天征雁下寒雲

上谷歌

四首

大寧無路援開平極目孤懸獨石城遙憶先皇親躍馬  
長驅絕塞苦提兵寒流汨汨交樵徑野戍荒荒列漢旌



千載土人談往事伯顏山下有英聲

永寧山外黃花鎮隆慶州旁土木城千里風烟開紫塞  
萬年根本是神京分工幸築沿邊壘深入宜防間道兵  
見說花當窺伺久窮邊誰識近年情

飛狐倒馬紫荆連此去朝廷路一千向日北門嚴鎖鑰  
於今南牧盛烽煙時名受脤當關將歲德臨分破陣年  
願假精兵臨塞上莫令疲病久戈鋌

陽河西帶鎮寧流順聖川南是蔚州比歲凶荒猶在眼

向來荼毒幾曾收  
靈關皆出紅沙嶺  
直峪斜通白草溝  
封植紫荆端在此  
倉場芻粟可深籌

紫荆關

漢家鎖鑰惟元塞  
隘地旌旗見紫荆  
斥堠直通沙磧外  
戍樓高並朔雲平  
峰巒百轉真無路  
草木千盤盡作兵  
誰識廟堂柔遠意  
戟門煙雨試春耕

春懷

春深關塞尚屯兵  
萬里邊防拱漢京  
不為翠華臨遠道

豈應金甲廢深耕轉輸坐見司徒急經畧親看相國行  
莫訝至尊忘北顧顯陵遷附聖人情

桑喬一首

喬字子木江都人嘉靖壬辰進士除戶部主事  
改授監察御史駕幸承天扈從未行乞歸逮赴  
詔獄廷杖謫戍九江卒戍所隆慶初贈光祿寺  
少卿有詩文集

歐楨伯云子木詩清雅  
俊逸有昌黎眉山之風

詩話子木按大同還一日初四尚書嚴嵩與馬  
可謂敢言矣然幾殺其身得不死者幸耳

歐楨

伯撰廣陵十先生傳十先生者儲瓘靜夫王軌  
戴卿景陽伯時趙鶴叔鳴朱應登升之蔣山卿  
子雲曾銑子重朱曰蒲子价  
宗臣子相其一則子本也

流水

江流九派是潯陽山勢千重擁建康日暮雲帆看不見  
夢隨江水過橫塘

包節三首

節字元達華亭籍嘉興人嘉靖壬辰進士除東  
昌推官徵授監察御史出按湖廣抗疏劾守陵

大璫廖斌不法為斌反誣下詔獄謫戍莊浪衛

有臺中湟中二集

莫子良云侍御詩於臺中見遂初之志焉其言麗以則於

湟中見窮愁之蘊焉其言婉以思顧元言云侍御詩意象都新令人炫目方之玉琢鼎彝款

識工緻特之弘綽耳

詩話侍御悅研風雅以文苑英華詩可續昭明文選體編成苑詩類選三十卷亦稱好事其所作大約取材于是西谷張氏惜其立志太銳任事太勇嫉惡太嚴為讒者所中其才與命妨志與時違故所就止是亦知己之言也

九日宴西寧城樓

九日依邊郡登高倍黯然  
山風寒擁葉城日澹浮烟菊  
亦窮荒見萸應故國偏何期  
流竄客猶接歲時筵

得侯介潭消息

消息西來未忍聞  
若為多難復離羣  
投荒自分先朝露  
歎逝那知對隴雲  
隔歲行塵猶避馬  
早春芳草已孤墳  
生還儻過山陽道  
長笛何堪聽夜分

贈俠少年

早隨飛將戰龍沙  
日晚收營過狹斜  
下馬直趨盧女肆

滿樓喧笑擁琵琶

馮汝弼 一首

汝弼字惟良平湖人嘉靖壬辰進士工科給事中  
以言事謫潛山縣丞遷知太倉州調揚州府  
同知不赴隆慶初追贈布政司參政有祐山集

詩話祐山入諫垣值汪尚書鉉掌吏部恃寵恣  
肆言官劾之不動祐山投袂起曰擊之不勝則  
其志益驕事有不可言者吾當以死爭之疏入  
帝怒時禮科給事中揭陽蔡宗愷河南道御史  
秦和曾紳皆廷杖死祐山與諸暨翁給事溥等  
八人俱外謫然翁終以此逐斯隆慶初有追贈

之典也祐山歸田後睦鄰敦俗鄉里德之曾孫  
孝廉洪業守其家法輕財博施至今東湖言好

義者必  
曰馮氏

夜發天津

明月天津岸孤帆水底明北來新鴈至彷彿是神京

徐楨  
二首

楨字世兆長洲人嘉靖壬辰進士歷官廣東參

政有堯山詩集

楊蘭亭奉使北上



出關稱使者知是棄繻生鳳詔從天下樓船截海行五  
雲還入夢千里欲過征到處逢迎是無勞念去程

鄒虹橋新居

欲謝塵中鞅言從野外居短籬齊樹槿新水曲通渠俗  
客無停軫幽人有報書清風北牕下高枕意何如

謝少南 二首

少南字應午上元人嘉靖壬辰進士歷官廣西

提學有粵臺集

府江雜言 二首

蠻煙不雨似雲濃  
白日陰陰慘澹中  
炎氣熏人冬亦暖  
不知何地候春風

落日官軍舉號齊  
琱戈畫盾障山蹊  
不嫌銅斗通宵擊  
却厭斑雞半嶺啼

王 畿 一首

畿字汝中紹興山陰人  
嘉靖壬辰進士官南京  
武選主事有龍溪集

詩話龍溪學術  
不純詩亦駁雜

### 登西天目

早起登山去芒屨結束牢但令雙足健不怕萬峯高

### 白 悅一首

悅字貞夫武進人嘉靖壬辰進士除戶部主事  
改禮部歷貲外郎中未幾補左春坊司直謫永  
平通判轉南京後軍都督府經歷稍遷南吏部  
郎中再謫河間通判復轉戶部主事改尚寶司

丞有詔遣江西按察僉事俄令致事有雒原集

皇甫子循云雒原調暢朗而思沉語婉麗而致遠音和平而易感音雋永而難數顧元言云

司直以建安風骨兼貞觀思致足以振響長慶繼軌太傅矣

秦省諸君招飲愛山園亭

幽林闢瑤圃飛閣臨華池高賢敞燕會慰我遠遊思情  
酣衆音翕日永杯行遲鮮飈空中來坐令炎霧披綠竹  
蔭雕櫺雜樹緣芳畦夕照燦雲峰澄波漾連漪淵魚伏  
蒲藻鳴鳥遷摶枝歡樂良不極惜茲光景馳慷慨君子

心明明乎令儀散聚靡有常邈迨天之涯眷言崇懿德  
式彼周行詩

趙伊一首

伊字子衡平湖人嘉靖壬辰進士歷官廣西按  
察副使有序芳園橐

案山

沙圩塔前春草齊案山樓外曉鶯啼  
畫船載酒三湖遍  
簫鼓聲中日又西

張謙一首

謙字仲受慈谿人嘉靖壬辰進士歷官按察副

使

東門行

步出城東門泛彼河上舟  
河流東北馳念子悵悠悠  
子行一何遠乃在渤海頭  
白日照遼陽朔風吹高丘  
王事各有程焉得斯須留  
執手淚盈把杯至不能酬  
垂楊夾廣衢有鳥聲相求  
感之增煩惋怨彼道路修  
丈夫自有

懷豈若兒女儔贈子明月珠照耀光九州所期在同心  
千載為我述

廖希顏

三首

希顏字叔愚茶陵人嘉靖壬辰進士有東雲集  
送岱宗諫議謫鎮遠

明堂再續周王禮宣室能容賈誼狂抗世有人還諫草  
清時憐汝獨遐荒龍吟鎮澤千峰雨雁度偏橋八月霜  
去住天涯各何意長星猶在太微傍

自注時  
有星變

送李約齋戴前峰二諫議謫象郡

天風吹雨氣蕭森行盡江潭是桂林萬死投荒明主意  
一封排闥小臣心城臨南斗枕榔出花暗春山瘴癘深  
彈劍長歌倍憐汝許身我亦愛南金

送方兵備赴蜀兼懷楊芳洲夫子

西路元戎看仗節南宮詞賦起明經天門初日餘殘雪  
江國浮雲伴使星乘興還移浣溪棹幾時同過草元亭  
生憎楊柳催春發故向愁邊却盡青



王瑛 一首

瑛字汝玉無錫人嘉靖壬辰進士官監察御史  
有石沙溪上集

任丘道中寓目

萬山秋色送行韉高樹雲生欲暮天  
可是河頭漁艇出  
鷺鷥驚起水西田

王廷幹 二首

廷幹字維楨涇縣人嘉靖壬辰進士除行人遷

南京刑部主事歷戶部員外郎中出知九江府  
有巖潭集

天壽山行宮

天旆三春發離宮四月開觀河懷禹跡問野見周才日  
氣生高嶺雲陰拂翠臺太平叨扈從文雅媿鄒枚

後湖答皇甫司勳

高皇方息戰於此濬澄湖版籍封疆遠絲綸詔命敷萬  
年修禹貢九譯獻周圖自得清風句南中麗景無

錢徽一首

徽字懋垣海鹽人嘉靖壬辰進士除行人擢禮  
科給事中轉右給事中贈太常寺少卿有承啟  
堂橐

贈呂東匯銀臺

薊門十載別此日意何如濟世餘三策謀身合二疏浮  
踪寄天地真樂自樵漁好借盧敖杖周行五岳墟


高世彥一首

世彥字仲修號白坪內江人嘉靖壬辰進士有  
自得齋橐

詩話白坪軒名自得其詩意象從容五言如羣  
鷗穿藻出一鳥捕魚飛月令如潮信年光似水  
流白雲棲樹杪青竹露牆根瑤瑟難為調牙籤  
刺有書潮來沙作篆雲過石為衣七言如對月  
云佳辰若此不易得良夜何其分外明九日云  
清時容我林泉嬾黃菊笑人塵務勞自娛云花  
陰數酌陶元亮日課一詩梅聖俞蜀中尚楊用  
修派詞多穠郁而其詩清潤如此所當洗眼觀  
也

冬江

秋盡寒潭斂水痕  
斷雲殘雪送朝昏  
深冬野鳥巢溪樹  
近渚人家掩石門  
何處洞簫吹夜雨  
一竿漁火徹朝暾  
蜀江氣暖春光早  
已有林花映小邨



明詩綜卷四十六